إِنَّ الدِّينَ عِنْلَ اللهِ الْإِسْلَامُ



لَا الْمُ اللَّاللَّهُ مُحَمَّدُ رَّسُولُ اللهِ







HADHRAT MUHYI-UD-DIN AL-KHALIFATULLAH

MUNIR AHMAD AZIM

16 Juin 2018 (01 Shawwal 1439 AH)

Après ki li fine salué tous so bane disciples (et tous bane Musulmans) entier le monde avec le Salaam - la Salutation de paix dans l'Islam - et Eid Mubarak, Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba Eid lor « La Nuit Eid-ul-Fitr »:

Kan Ramadan terminer, nous gagne la nuit d'Eid - Lailatul Jaa'izah, c'est-à-dire, la nuit de la rétribution. Le matin d'Eid, Allah (swt) envoye bane anges (Malaïkah) lors duniya, kot zot prend position et zot crier avec ene la voix ki zis bane dimounes et bane Jinns pas tender:

« Ô Ummah Muhammad (saws) sorti depuis dans zot la caze, vine vers zot Seigneur ki Majestueux et Magnifique ki accorde beaucoup et pardonne bane péchés majeures. »

L'heure bane dimounes pé alle vers Namaz Eid, Allah dire bane anges: « Ki récompenses ena pour sa employé ki fine travail plein là? » Bane anges réponne: « Ô nous Seigneur et Maître, li juste ki zot gagne pleine récompenses pour zot service. » L'heure là Allah dire: « Mo prend zot témoins, Ô mo bane anges, ki parski zot (c'est-à-dire, bane dimounes) fine garde Roza pou Moi pendant Ramadan, et zot fine deboute devant Moi en prière pendant la nuit, Mo fine donne zot comme récompenses pour Mo plaisir le pardon. »

Allah (swt) adresse So serviteur: « Ô Mo serviteur, demande Moi astaire. Mo jurer par Mo l'Honneur et Grandeur, ki séki to demande Moi dans to l'assemblée pour l'au-delà Mo pour donne toi. Et séki to demande Moi pour duniya Mo pou donne toi séki dans to l'avantage. Par Mo l'Honneur, Mo jurer, ki aussi longtemps ki to pour obéir Mo commandement, Mo pou couvert to erreurs. Par Mo l'Honneur et Mo Grandeur Mo jurer ki Mo pas pour disgrâce toi devant bane transgresseurs et bane non-croyants. Retourne depuis ici, to fine pardonner. To fine faire Moi plaisir et Mo fine content avec toi. »

Bane anges, l'heure zot trouve sa grand cadeau ki *Ummah* de Hazrat Muhammad (saws) gagner pour Eid, zot satisfait et joyeux.

*** Ô Allah faire nous aussi vine parmi sa bane chanceux là, Ameen. ***

Nous trouver ki dans sa Hadith là ena bane dimounes ki pas jouir de sa pardon général dans Ramadan et zot malchanceux ki même le matin d'Eid zot pas fine gagne ene part de pardon. Parmi sa bane dimounes là ena bane ki dispute entre zot, fine contigner commette bane péchés, pas fine conne et ni fine montrer respect pour sa mois béni là. Zot fine contigner dans faire péchés aller même et aussi bane ki désobéir zot parents. Zot fine déplaire Allah (swt), et astaire là kot zot pour aller?

Li vraiment chagrinant ki pour quelques gains ou l'honneur mondaines zot fine vine cible de la malédiction d'Allah, de So Rassool et de bane anges et en même temps zot exclure zot depuis pardon abondant d'Allah. Ou capave fine gagne ene victoire temporaire lors ou l'ennemi et l'honneur mondaine, mais sa gain là li nannié du tout kan malédictions Allah (swt), malédiction de So Rassool et celui de bane anges lors ou kot ou pas fine gagne pardon et miséricorde Allah. Kot ou été là, oublier tous bane conflits, li encore temps pour corriger et répentir

sincèrement azordi. Demain ou pou bizin diboute devant ene Juge kot ni rang, ni l'honneur, ni position ou travail et ou statut, ni ou richesse avec ou l'argent ou dibien pour capave aide ou.

Ou pou devant ene Juge ki juste, et kot zis ou bane bon actions ki pour compter et Li tousel ki conne tous ou bane mouvements et surtout tous ou l'intention. Rappelle ki Allah (swt) capave pardonne nous bane manquements envers Li, mais Li pas pour pardonne, sans punition égale, transgressions dans nous relations avec nous prochains.

Rassoollullah (saws) fine dire: « Celui ki faire faillite dans mo Ummah c'est celui ki vini jour Qayamat et li amène avec li bane bonnes actions comme Namaz, Roza et Zakaat (Charité obligatoire) mais li fine aussi blesse quelqu'un. Li fine accuse à tort (mette blâme) lors ene lotte et fine blesse li..., avec résultat ki sa bane dimounes là pour ena complaintes contre li et zot témoigner contre li. Comme punition, so bane Nékis pou prend avec li et pour donne bane victimes là. Et kan so bane Nékis pour épuiser, li pour prend péchés de so bane victimes et à cause sa li pou rentre dans l'enfer. » (Muslim).

Donc, nous trouver ki même si li ena aussi beaucoup bons actions, li pour dans grand désespoir. Sa Hadiths là aussi amène ene message joyeux. Allah (swt) dire ki Li pas pou déshonore, disgrâce et humilié So serviteur sincère devant et parmi bane non-croyants et bane pécheurs. Eski sa même, pas ene grand faveur pour bane ki cherche So bienveillance ki Li pour cachiette zot fautes et pas montrer sa les autres ?

Abdullah ibn Umar (ra) rapporter ki Rassoollullah (saws) fine dire: « Jour Jugement, Allah pour appelle ene croyant pour costé près avec Li et pour jette ene rideau, pour ki personne d'autre pas trouver. L'heure là Allah (swt) pour montrer li so bane péchés et transgressions et li pour admettre (ki li fine faire sa bane péchés là). Sa dimoune là pour décourager par quantité péchés ki li ena. L'heure là Allah pour dire: 'Lors duniya Mo ti couvert to bane fautes, et zordi aussi Mo cachiette zot et Mo pardonne zot.' Après pour donne li so livre de bane bonnes actions. » (Bukhari, Muslim, Ibn Majah).

Dans plusieurs Hadiths faire mention du pardon pour bane ki rode le plaisir d'Allah. Nous bizin donc prend bien précaution pour pas attaque bane dimounes pour zot fautes, parski nous capave être le vrai perdant à travers médisance et

railleries envers bane ki dans zot propre façon essaye pour faire plaisir Allah. Allah (swt) capave couvert zot fautes et pardonne zot à travers zot actions, tandis ki nous, par médisance, bouffonneries, disputer, la guerre, la jalousie, la haine et railleries nous pé cause nous propre destruction.

La nuit d'Eid c'est la nuit de la rétribution. Kan mo dire la nuit Eid c'est ki kan la lune Eid paraite et le mois de Ramadan terminer avec l'apparition de la lune, ou si pas trouve la lune le 29ème nuit de Ramadan, pareil couma sa l'année là, la nuit après le 30ème Ramadan, après le coucher du soleil kot nous fini rentre dans le mois de Shawwal, c'est-à-dire, le premier jour de Shawwal, et *Eid-ul-Fitr*. Alors, Allah (swt) récompense So bane serviteurs ki donne sa la nuite là so valeur.

La majorité musulmans lé temps annonce Eid, zot senti la fatigue Ramadan et zot alle dormi et reposer. Ena zot content et zot commence faire préparation bane gâteaux, briani pour le lendemain, guette bane linges, tandis ki zot ti capave profite sa la nuit là dans faire *Ibaadat* et *duahs*.

Rassoollullah (saws) fine dire : « Quiconque reste éveiller la nuit avant célébration Eid le lendemain avec but pour gagne récompense, so lé cœur pas pour mort jour kot tous les cœurs pour flétri. » (Ibn Majah).

Donc, pour terminer, nous demande *duah* avec Allah (swt) pour ki Li donne nous *Hidaayat* pour comprend le message et pour ki nous corrige nous et nous répentir.

Ya Allah, protège nous et guide nous pour ki nous pas tombe dans sa catégorie de bane dimounes ki pas gagne To clémence là. Ya Allah aide nous pour ki nous contigner dans nous mission et ki nous faire Toi plaisir. *Ameen, Summa Ameen!*

Mo souhaite zot tous **Eid Mubarak**. Ki Allah faire zot *Mubarak* avec sak jour ki vini dans zot la vie et ki zot consacrer pour Li et pour servir l'humanité dans n'importe ki façon afin ki la paix dans le monde rétablir et ki le monde retrouve la lumière divine en reconnaissant l'unicité d'Allah et réunir couma ene sel lécorps et ene sel l'âme. *Insha-Allah, Ameen*.

